

武

備

志

武備志卷二百三十六

防風茅元儀輯

占度載

度 四十七

四夷 十四

海外諸國考

茅子曰、東南諸國、其朝貢敬共、無如占城琉球、然
占城、古越裳也、明王大度、置之版圖之外、反以爲
安南利、琉球近亦脅于倭、不以時至、君子每咨歎

焉、修文德以來之、張武功以動之、均之聖王之略也、豈必勤兵而後服哉、然我之威德衰、則彼亦鳥獸散、故聖王兢兢焉、

琉球

三佛齊

占城

真臘

暹羅

蘇門答刺

爪哇

古俚

淳泥

滿刺加

榜葛刺

錫蘭山

蘇祿

柯枝

祖法兒

溜山

阿丹

白葛達

瑣里

西洋瑣里

彭亨

百花

婆羅

阿魯

小葛蘭

古里班卒

呂宋

合猫里

磔里

打回

日羅夏治

忽魯母恩

忽魯謨斯

甘巴里

古麻刺

討來思

吃力麻兒

納失者罕

亦思把罕

淡巴

甘把里

答兒密

阿速

沙哈魯

琉球

琉球在海東南、自福建梅花所開洋、順颶利舶、七日可至、漢魏至唐宋、不通中國、隋嘗遣兵虜其男女五千人、元遣使招諭、意不從、洪武初、國分中山、山南、山北、稱三王、遣使朝貢、十五年、賜中山王察度、山南王承宗、鍍金銀印、金幣、使還言、三王爭雄相攻、賜詔諭之、并諭山北王怕死芝、十六年、賜山

宗

北王印文綺王妃姪相寨官各有差二十五年中山遣子姪及其陪臣子弟入國學上喜禮遇獨優賜閩人三十六姓善操舟者令往來朝貢永樂二年察度卒詔封其世子武寧嗣王是年山南王承察度卒無子令其從弟汪應祖攝國事應祖使來請命如山北王故事諭蹇尚書遣使賜應祖冠服嗣山南王九年中山王思紹令坤宜堪彌貢馬及方物以其長史程復來見表言長史王茂輔導有年乞陞國相兼長史事又言復本中國饒州人輔

臣祖察度四十餘年不懈于職今年八十有一乞
令致仕還其鄉上從之陞復琉球國相兼左長史
致仕還饒茂國相兼右長史景泰元年中山王尚
思達遣人朝貢三王嗣封皆請於朝已而山南山
北爲中山所并中山遣使朝貢令三年一貢貢無
過百五十人察度後五傳至尚圓嗣王卒子尚真
嗣嘉靖十一年尚真卒子尚清請嗣遣左給事中
陳侃行人高澄以太牢祀真封清嗣王賜王妃冠
服錦幣使臣疏言弘治正德時修撰羅倫等嘗使

安南、安南乞留詔勅爲鎮國之寶、倫爲請得留、卽琉球請留如安南、海外遠、不得卽、請乞下禮官議、議請如安南、使至國授封、王拜曰、天朝詔勅藏金匱者八葉于茲矣、請留、使許之、比還、遣其王親寧吉長史蔡瀚上表謝使、上使琉球錄言大明一統志中載琉球有落滌王、居壁下、聚髑髏、非實事、杜氏通典集事淵海羸蟲錄星槎勝覽之所述、亦傳者妄也、乞下史館從之、其後爲日本所脅、事見日本考中、其俗以盈虛爲晦朔、以草木爲冬夏、人皆

去髭黥手羽冠毛衣無禮節好剽掠既遣人學於國學夷習稍變奉正朔設官職被服冠裳陳奏章表著作篇什有華風焉今其國中王下有王親不與政次法司官次察度官司刑名次那霸港官司錢穀次耳目官司訪問皆土官爲武職以上世及所轄地爲姓名其大夫長史通事官司朝貢有定員爲文職皆三十六姓人及學於國學者爲之王并日視朝旦中易凡三朝羣臣搓手膜拜尊且親者入殿坐飲酒卑疏者移時長跪階下歲元旦聖

節長至、君臣冠服拜龍亭祝慶、子爲親喪、數月不
肉食、人死、以中元前後日浴尸、溪水去腐肉、取骨、
纏以布帛、裹葦草埋土中、王及諸臣家匣骨藏山
穴、竅木爲小牖、歲時祭掃、啓視之、地無貨殖、不通
商賈、朝貢乘航海上、漁鹽泛小艇、無竹筏、信鬼畏
神、神以婦人爲尸、號女巫、女巫之魁稱女君、白日
呼嘯、聚輒數百人、攜枝戴草、騎步縱橫、時入王宮、
褻游狎戲、一唱百和、音聲淒慘、倏忽往來、莫可踪
跡、馮附淫昏、矯誣禍福、王及世子陪臣皆頓首拜

跪王居山巔國門名歡會府門漏刻殿門奉神朴
素無金碧之飾賦法略如井田王臣民各分土爲
祿食上下無征歛有事一取諸民事已卽已用刑
甚嚴盜竊卽荆劓家富貴者瓦屋不過二三楹餘
皆茅土風雨飄搖以螺殼爨爨無釜甑耕無鐵婦
人嚼米爲酒男子煮海爲鹽市用日本錢十當一
如宋季鶩眼縫貫人無貴賤皆驍健耐勞苦饑寒
不知醫藥而無疾疫兵甲堅利射可至二百步進
止有金鼓鄰國視爲勍敵然好爭狠鬪輒刃殺人

度不能脫，卽剖腹自斃。其山川龜鼉嶼、澎湖島爲大。或曰：國西古米山有礁，甚險，舟至輒敗，卽落淙也。產馬、海巴、牛皮、磨刀石、硫黃、銅、錫、扇。山無猛獸，以故多野馬、牛、豕、鬬、鏤木、蘇木、胡椒、諸香，非其產也。又有小琉球，近泉州，閩人言霽日登鼓山，可望而見入國朝未嘗朝貢。或曰：并入琉球。琉球旁有毗舍那者，島中小夷，鳥語鬼形，袒裸肝肱，殆非人類，不通中國。

三佛齊

也亦一寄

三佛齊卽舊港，又名淳淋，在東南海中。本南蠻別種，初隸爪哇，有地十五州。東距爪哇，西距滿刺加，南距大山西，北濱海。番舶輻輳，多廣東漳泉人，土沃宜稼穡。人好賭博，習水戰，服藥刀不能傷。遇敵敢死，鄰國畏之。水多土少，將領得居陸，民率架筏水中，架梁柱，語言如爪哇。市用錢布，字用梵書。其屬有單馬令、凌牙斯、蓬豐、荖牙、儂、細蘭諸國。洪武初，主恒麻沙那阿稱臣入貢。四年，遣玉的力馬罕亦里麻思奉金字表朝貢，賜大統曆文幣。六年，使

來貢八年使從我招諭拂菻十年恒麻沙那阿卒
賜王子麻那者巫里三佛齊國王印印駝鈕銀質
鍍金是時廣東有陳祖義者脫罪避居其國久之
得爲將領暴橫掠過客永樂中太監鄭和統海舶
下西洋至三佛齊有施進者祖義鄉人也訴于和
和擒殺祖義承制官進仍留舊港爲將領進沒女
嗣官產鶴頂火雞神鹿金銀水晶珠瑠璃珊瑚犀
角象牙龍腦諸香猫睛石薔薇水阿魏沒藥血結
鶴頂鳥大於鴨腦骨厚寸餘外黃內赤鮮麗可愛

火雞大於鶴、頸足亦似鶴、軟紅冠銳觜、毛如青羊色、爪甚利、傷人腹致死、食炭、神鹿大如巨豕、高三尺、短毛豕喙、蹄三跲、

占城

占城、古越裳、秦林邑、漢象林、漢末、區連殺縣令、自稱林邑王、遂不入版圖、唐元和初、改號占城、宋淳熙中、襲破真臘、慶元中、真臘復讐、俘殺幾盡、更立真臘人爲主、洪武二年、遣吳用顏、宗魯、楊載等使占城、爪哇、日本等國、賜王璽書、是年遣使蒲旦來

都朝貢言安南侵境上遣使詔諭安南罷兵是年
國主阿答阿者遣虎都蠻來朝貢虎象遣中書省
管勾甘桓會同館副使路貢賢封阿答阿者爲占
城國王賜大統曆金綺四年阿答阿者遣答班爪
卜農奉金葉表朝貢言安南數侵境乞賜兵器樂
人俾安南知我乃聲教所被輸貢之地不敢輒欺
負上憐之命中書省咨王言交鄰有道事上以誠
占城安南旣皆臣事朝廷豈可擅兵相毒卽安
南令其罷兵兵器不爾吝但以安南故賜爾是助

爾構兵也、樂器有聲律、華夷方言本異、中國人不
可遣、遣爾國人能習華音者來習肄、十六年、遣子
來賀聖節、賜勘合文冊、二十四年、使至、以臣弑君
故絕之、永樂四年、王占巴、鎖里人、勅王的賴得黎
賊父子及其黨惡、卽械送京、尚書陳洽在南交軍
中、馳奏占城國王占巴的賴奉命出兵討安南、陰
懷二心、愆期不進、及進至化州、輒肆虜掠、又以金
帛戰象資季擴、季擴亦以黎蒼女遺之、復約季擴、
舅陳翁挺等三萬餘人復侵升華府、隸四州十一

縣地驅掠人民罪下季擴一等耳請發兵討之上
以交趾初平不欲窮兵遠夷遣使諭王歸我侵地
永樂後遣人朝貢令三年一貢正統六年國人請
封其嗣王遣使冊封成化中遣使冊封正使卒海
上副使論罪戍邊其國在大海南南距真臘西距
交趾東北際海自閩長樂五虎門西南行順風可
十日至東北百里海口立石塔爲標舟至是繫焉
俗獷悍果于戰鬪尚釋教王冠三山金花玲瓏冠
衣白跣足乘象或黃犢車臣莢葉冠男蓬頭女後

椎結所居茅茨不得踰三尺衣紫衣衣玄黃罪死
出入乘象馬粒食亦鮮食殺牛祭鬼驅象逐邪市
用金銀焚衣祭天釀酒甕中俟熟賓主繞甕坐筒
而輗且輗且注水味盡而止文書用羊皮及黑木
皮無閏月晝夜各分五十刻王當賀日沐人膽汁
將領獻人膽爲賀王在位三十年卽入山茹素受
戒令子姪攝國居一歲顓天矢日我不道當充虎
狼食或病死暮年得無恙復入爲王於是國人呼
爲芳嚟馬哈刺札云有號屍致魚者婦人也目無

瞳夜飛頭入人家食小兒穢氣侵兒腹兒卽死頭
返合體如故失其體不得合卽死夫不聞者罪之
產金銀錫鐵獅象犀牛毒瑁諸香朝霞大火珠菩
薩石薔薇水猛火油檳榔諸文異木胡椒白藤吉
貝絲紋白氎布孔雀山雉伽南香唯此地有之價
亦高觀音竹如藤長丈八尺許色黑如鐵寸二三
節犀角象牙最多犀如木牛大者八百斤體黑無
毛蹄有三跲獨角在鼻端長者可尺五寸馬小於
驢波羅蜜形如東瓜

真臘

真臘本扶南屬國一名占臘在東海中隋始通中國唐神龍中并扶南而國分爲二其南近海多陂澤爲水真臘北多山阜爲陸真臘後復合爲一宋宣和初封爲真臘國主慶元中破占城立其國人爲占城王占城遂爲屬國又有參半真里登流眉蒲甘等國皆屬真臘聚落頗衆地亦廣洪武六年國王忽兒那遣奈亦告郎表獻方物賜大統曆文綺二十年正黎列保昆耶甘苦者遣使貢象及方

物景泰二年貢賜王及妃文綺朝貢至今不絕其俗尚華侈東向爲上右手爲潔縣鎮風習大類占城王三日一視朝婚娶燃燈不息視力耕種產銅金諸香象翠羽嘉樹異魚

暹羅

暹羅本暹與羅斛二國在南海中暹土瘠不宜耕稼羅斛土平衍種多獲暹仰給焉元至正間暹降羅斛洪武四年暹羅斛國王參烈昭毘牙遣奈思哩儕刺識悉替奉金葉表朝貢賜大統曆十年遣

子昭祿羣鷹奉金葉表貢象及方物遣使賜詔及
暹羅國王之印十六年給勘合文冊令如期朝貢
永樂元年稱暹羅國十五年瑣里人昭祿羣鷹哆
囉諦刺爲王遣柰必上表貢方物乞量衡式賜古
今烈女傳金綺量衡令三年一朝貢宣德中稍減
賜物著令其國方千餘里羣山環繞峭拔崎嶇地
下濕土踈惡氣候嵐熱不齊自占城西南舟行七
晝夜至其國王宮壯麗民樓居其樓密聯檳榔片
藤繫之甚固籍以藤蓆竹簟寢處于中王白布纏

首腰束嵌絲帨，加錦綺跨象，或乘肩輿，尚釋教，國
人效之，好爲僧尼，婦人多智，夫聽於妻，妻與中國
人私，不爲恠。男陽嵌珠玉，富貴者範金盛珠，行有
聲，婚則羣僧迎壻至女家，僧取女紅貼男額，稱利
市喪禮，貴者灌水銀葬，民間鳥葬，言語大類廣東，
俗澆浮，習水戰，好鬪，喜寇掠，市用海貳，煮海爲鹽，
釀秫爲酒，產寶石，奇香，異木，翠羽，獅，白象，白鼠，蘇
木，賤如薪，色絕勝，六足龜，珊瑚。

蘓門答刺

蘇門答刺，卽古蘇文達那，西洋之要會也。東南大山西北距海，山連阿魯那，孤兒黎伐三國自滿刺加西南行，順風五晝夜至答魯蠻村，舍舟陸行十里至其國，無城郭，有大溪入海，海口大濤，船至此往往沒溺。洪武中國王遣人奉金葉表貢馬及方物，永樂三年國主鎖丹罕難阿必鎮遣阿里來朝貢，封爲蘇答刺國王，賜印誥金幣，五年使來貢，已而王與花面王戰敗，中矢死，子弱不能復讐，其妻發憤，令于國曰：能復此讐者，我以爲夫。與共國事。

有漁翁聞之率衆敗殺花面王王妻遂從漁翁永樂七年王來貢上喜厚賜之十年遣使至其國故王假子率部衆殺漁翁王王子蘇幹利率衆奔于峭山時時相侵欲復讐十一年太監鄭和擒送京伏法漁翁王子感激貢方物甚夥宣德中貢使數至用金葉表十年封其子嗣王皆有賜至今朝貢不絕風俗淳厚言語和媚室廬婚喪衣服物產類滿刺加田磽澆少熟番舶往來財貨充牣人饒富市用金錫錢惟酋長好殺殺人輒取血浴身花面

王者卽那孤兒王也、國小、僅比大村、祇千餘家、人皆顴面、以故號花面、風俗語言類蘇門答刺、

爪哇

爪哇、古闍婆國、又名莆家龍、元稱爪哇、其國分東西二王、所屬有蘓吉丹、打板打綱底、勿諸國、洪武三年、王昔里八達刺遣入的占必、奉金葉表貢方物及黑奴三百人、納元所授宣勅、已而我使至三佛齊、爪哇要而殺之、十三年、王八達那巴那務遣阿烈彞烈時奉金葉表朝貢、上遣其使還、詔諭責

王遂絕其使、永樂二年、其國東王遣使朝貢、請印與之、五年、西王都馬板與東王戰、滅東王、時我舟過東王城、西王殺我百七十人、西王懼、遣亞烈加恩謝罪、勅詰責西王、令償死者黃金六萬兩、已而遣人貢萬兩、禮官請索如數、上曰、朕利金耶、令遠人知畏耳、蠲其金、賜鈔幣諭之、十六年、西王楊惟西沙遣人獻白鸚鵡、正統八年、令三年一貢、其國四鄉、初至杜板、僅千家、二酋主之、流寓多廣東、漳泉人又東行半日、至廝村、中國人客此、成聚落、遂

名新村約千餘家村主廣東人番舶至此互市人
寶克溢人富饒又南水行可半日至淡水港乘小
艇行二十餘里至蘇魯馬益亦有千餘家半中國
人港傍大洲林木蔚茂有長尾猿數萬又水行八
十里至漳沽登岸西南陸行半日至王所居滿者
伯夷僅二三百家總領七八人王宮磚墉墉高餘
三丈方三十餘里屋高四丈地覆板蒙藤花蓆跏
趺而坐民居茅茨磚庫坐卧于内王蓬頭頂金葉
冠胷紫嵌絲帨腰束錦綺佩短刀跣足跨象或乘

牛、民男蓬頭、女椎結、上衣下帔、男必腰刀、刀極精巧、刑無鞭朴、罪不問輕重、藤繫刃殺之、市用中國古錢、衡量倍于中國、貴磁麤綺帛、國人大抵三種、西番賈胡居久者、服食皆雅潔、中國流寓者尚回回教、持齋受戒、曰唐人土人、有名無姓、尚氣好鬪、顏色黝黑、獠頭赤脚、信鬼坐卧無椅榻、飲食無匙箸、啖蛇蟻蟲蚓、與犬同寢食、不爲穢也、婚男造女家、後五日迎婦、金鼓刀盾、前後甚都、婦裸披髮跣足、縈嵌絲帔、戴被金珠、綵飾寶粧、喪有水葬火葬

犬葬，惟死者所欲產金珠、銀犀角、象牙、玳瑁、青鹽、
檳榔、椒香、蘇木、枕榔木、吉貝、倒掛鳥、綵鳩、綠鳩、紅
綠白鸚鵡、白鹿、白猿猴。

武備志卷一百三十七

防風茅元儀輯

占度載

度

四夷

十五

海外諸國考二

古俚

古俚、大國、西洋諸番之會、去中國十萬里、西瀕海、南距柯枝、自柯枝海行、可三日至、永樂元年、王馬

那必加刺滿遣馬戍朝貢馬五年遣太監鄭和賜
王誥幣陞賞其將領有差王好浮屠敬象牛老不
傳子傳外孫否則傳弟無外孫弟傳善行人族類
分五種如柯枝王南毘人不食牛將領回回人不
食猪大家晨起用牛糞塗地煨牛糞爲囊佩之每
旦水調抹額及股國事皆決于二將領土宜麥多
馬俗尚信義行者讓路道不拾遺海濱爲市通諸
番用金銀錢以葫蘆爲樂器紅銅絲爲絃歌聲相
協鏗鏘可聽刑無鞭笞輕斷手足
誅戮沒

產夷其族有西洋布曰捨黎本出隣國坎夷巴四闊四尺五寸色絲間花悅闊五尺產孔雀白鳩馬無餘鳥諸香嘗貢金絲寶帶金絲細如髮結花綴八寶珍珠鴉鵲石

淳泥

淳泥本闍婆屬國在西南大海中統十四州洪武四年王馬漠沙遣亦思麻逸進金表銀箋貢方物賜金綺永樂三年遣使封其國主麻邪惹加那乃爲淳泥國王賜印符誥幣六年王率其妃及子來

朝遣使迎勞之。福建至南京，王上金表，獻珍物。妃箋獻中宮、東宮，上宴王奉天門。是年王卒于會同館，諡恭順，葬石子岡，樹碑立祠，有司春秋祀。封其子遐旺嗣，賜玉帶、金銀綺幣、器皿，使送歸國。遐旺請封其國後山，賜名長寧鎮國，上爲文刻石。十二年，洪熙元年，皆來朝貢。俗以板爲城，以銅鑄甲，煮海爲鹽，釀秫爲酒，喪葬有棺，盛食無器，室宇弘敞，原田豐利，習尚奢侈，愛敬華人。王服頗效中國，產片腦、諸香、象牙、吉貝、玳瑁、鶴頂。

滿刺加

滿刺加、永樂三年、王西利入兒速刺遣使奉金葉表朝貢、言願內附爲屬郡、效職貢、七年、太監鄭和克冊封使、賜印誥錦綺、封爲滿刺加國王、九年、嗣王拜里迷薊刺率其妃其子五百四十人來朝、上御奉天門宴王、賜玉帶羽儀鞍馬金銀錢鈔錦綺、王妃冠服、子姪僉從賞各有差、十年、遣使送還國、十二年、王母來朝貢、厚賜之、二十二年、宣德九年、王復來朝貢、賜亦厚、正統十年後、數遣使來朝貢、

天順三年王無咎佛哪沙卒子舟茫速沙請封遣使冊立爲王成化末給事中林榮行人黃乾亨奉使溺海死廕子入監讀書其國舊名五嶼東南距海西北皆山地瘠鹵故未稱國隸暹羅歲輸金五千兩既奉我正朔始不隸暹羅王白帛纏首衣青花袍躡皮屨乘輜俗淳朴尚回回教民舍如暹羅婚喪大類爪哇臘榻跌坐剝木爲舟泛海而漁旁海人畏龜龍龜龍高四尺四足身負鱗甲露長牙遇人卽嚙嚙卽死山有黑虎視虎差小或變人形

白晝羣入市覺者擒殺之、

榜葛刺

西天有五印度國、榜葛蘭者、東印度也、永樂六年、
王霸牙思丁遣人朝貢、九年、至太倉、命行人徃宴
勞之、十二年、王蹇弗丁遣人奉金葉表獻麒麟、國
最大、自蘇門答刺海、行過翠藍島、至淞地港、更小
舟、行五百里、至鎖納兒港、登陸行三十五里、至其
國、地廣人稠、財物豐衍、甲於諸鄰國、國有城郭、王
及諸官皆圓面人、男祝髮、白布纏頭、圓領長衣、吏

綵悅躡皮屨市用銀錢海貳五領山最高大氣候
常熱如夏賦十二刑笞杖徒流官有印章行移軍
有糧陰陽醫卜百工技藝大類中國有衣黑白花
衫綵悅佩珊瑚琥珀纓絡繫臂硝子鐲釧歌舞侑
酒者曰根肖速魯柰柰蓋優人也、能作百戲以鐵
索繫虎行市中入人家解索坐虎于庭裸而搏虎
虎怒交撲仆虎數回乃已、或手投入虎喉虎亦不
傷戲已仍繫之家、人爭以肉啖虎勞戲者錢曆有
十二月無閏風俗朴厚人好耕殖一年二熟產鎮

鐵翠羽、琉璃蛇、馬桑漆樹、絲綿尤多。鎗剪最巧利。布數種，有濶四五尺者，鷲黑鷲勒濶四尺，背面皆毳絨厚可五分，卽兜羅錦也。白樹皮布，膩滑光潤如鹿皮。椰茭爲酒，檳榔當茶。

錫蘭山

錫蘭山在大海中，海中有翠藍山，最高大，自山東南乘風可三日至赤卯塢。塢人穴居，男女皆裸，若野獸，不粒食，食芭蕉子、波羅蜜、魚蝦。又西海行可十日至佛堂山，泊舟處濱海山麓有卧佛寺，佛榻

寶飾極華麗，又西北陸行五十里，至王居。王尚釋重象牛，煨牛糞，灰塗體，飲牛乳，不食其肉。殺牛者罪死。王宮民居，旦必調牛糞塗地而禮佛。國富饒，地廣人稠，亞於爪哇。民上裸，下纏悅加壓腰，去鬚毫，留髮布纏之。女椎髻于後，下縈白布。飲食不令人見，產青紅黃鴉忽石、水晶、海洲、有珠池，日映光浮起，閃閃射日間。歲一淘珠，諸番賈爭來市珠。土宜稻，不宜麥。市用金錢，重麝香、綺絹、青磁器、銅錢、樟腦。永樂九年，王亞烈若柰兒鎖里人絕我使途。

太監鄭和俘至京，十年封耶巴乃那爲王，赦亞烈若奈兒還國。耶巴乃那，故王族人也。一名不刺葛麻巴思刺查，國人以爲賢，故封之。遣使送歸，詔諭其國。正統十年，遣使耶把刺謨的里啞來朝，貢珠寶石。天順三年，王葛力生夏刺昔利把交刺惹復遣使朝貢。

蘇祿

蘇祿在東南海中，人鮮粒食，食魚蝦螺蛤，短髮纏皂縵，煮海爲鹽，釀蔗爲酒，織竹布爲業，氣候常熱。

永樂十五年其國東王巴都葛叭答刺西王巴都葛叭蘇哩峒王叭都葛巴刺十各率其妻子頭目來朝貢珍珠玳瑁諸物賜王冠服玉金帶蟒龍金銀錢鈔錦幣器皿王妃王子女姻戚頭目賜物各有差三王者東王爲尊西峒二王副之歸次德州卒命有司營葬爲文樹碑墓道畱其妃妾及僉從十人守墓令畢三年還國遣使封其長子都麻合爲蘇祿國東王十九年遣使來貢

柯枝

柯枝一名阿枝東連大山西南北皆海自葛蘭山海西北行一晝夜可至永樂二年王可亦里遣三者答兒朝貢請封其國大山詔封爲鎮國山賜碑文是時太監鄭和使至其國國王鎖里人也首纏黃白布上不衣下縈絲帨束綵壓腰綴椰木葉苦屋國人五種曰南昆與王同類祝髮線懸脰爲貴族次回回人次富有財者曰哲地次牙僧曰革全又次卑賤者曰木瓜木瓜濱海而居業漁樵屋簷不得過三尺上衣不過膝途遇南昆哲地卽伏候

過乃起王尚浮屠敬象牛建寺範金爲佛每日鳴鐘鼓汲泉灌佛頂數回已乃禮之有曰濁肌者蓋優婆塞也娶妻不剃胎髮髮縷縷垂後牛糞灰塗體行吹大螺妻隨之乞錢氣候常熱多雨市用金銀錢銀錢十五當金錢一產珠象牙蘇木

祖法兒

祖法兒亦名左法兒東南皆海西北重山自古俚西北海行十晝夜可至無城郭俗尚回回教體幹修碩語言朴實王白布纏頭衣青花絲悅或金錦

袍靴履、乘轎跨馬、前後列象、駝馬鼓吹、氣候常如
秋、市用金銅錢、錢文人形、永樂中、王亞里遣人來
朝貢、宣德中、又來朝貢、產西馬、駝、鶴、頂駝、雞、福鹿、
片腦、沉香、乳香、卽樹脂、諸奇藥、以易中國紵
絲、磁器、駝、雞、如鶴、長三尺、脚二指、毛如駝、行亦如
之、駝、單峯、或雙峯、皆可乘、

溜山

溜山、四面濱海如洲、在西海中、有石門、如城闕、土
瘠、無城郭、依山聚居、八村稍大、皆以溜名、可通舟

三千不
以里計
亦古人
所未言

楫餘小溜無慮三千、土人曰、此弱水三千也、人巢
居穴處、不識菽粟、啖魚蝦、無衣、草木葉蔽前後、舟
行遇風、失入溜、卽溺、溜山傍有牒幹國、皆回回人、
俗淳厚、業漁、好種椰樹、氣候常熱如夏、市用銀錢、
產龍涎香、海貳、椰皮結繩可貫板成舟、塗瀝青、堅
如鐵釘、鮫魚一名溜漁、織絲悅甚精緻、亦有織金
悅、永樂中國王亦速福遣使來朝貢、

阿丹

阿丹、近古俚、瀕海可舟行、國中富饒、有馬步勝兵

七八千隣國畏之永樂九年詔中使鄭和賜命互市。

白葛達

白葛達海中小國土瘠俗尚佛教宣德七年國王遣和者里一思等來朝貢。

瑣里

瑣里西海中小國物產甚微有撒哈刺諸異布洪武五年國王卜納的遣撒馬牙茶嘉兒幹的亦刺丹八兒奉金字表朝貢圖上其土地山川賜大統

曆金幣永樂元年復遣人朝貢

西洋瑣里

西洋瑣里近瑣里視瑣里差大物產大類瑣里洪武三年使來以金葉表文貢方物上喜王敬中國涉海道甚遠賜甚厚永樂元年復遣人朝貢上曰海外遠夷附載番貨勿征二十一年西洋十六國遣使千二百人貢方物至京師西洋瑣里貢獨豐美

彭亨

彭亨在東南海島中、並山、山傍多平原、禽獸稀少、草樹繁茂、沃土宜穀、饒蔬果、洪武十一年、遣人奉金葉表朝貢、賜綵幣、永樂十二年、遣蘇麻固門的里來朝貢、其俗上下親狎、無寇盜、男女椎髻、好誦佛經、煮海爲鹽、釀椰爲酒、產冰腦、諸香、花錫、

百花

百花在海中、依山爲國、國中有奇花嘉樹、民俗饒富、尚釋教、洪武十一年、國王刺丁刺者望沙亦遣入智亞壇奉金葉表朝貢、產紅猴、龜筒、玳瑁、孔雀、

倒掛鳥胡椒

婆羅

婆羅負山面海人多念佛素食惡殺喜施永樂四年國王遣人勿黎哥來朝貢真珠玳瑁瑪瑙車渠賜王及妃文綺

阿魯

阿魯一名啞魯在西南海中土廣人稀物產亦薄永樂五年國王速魯唐忽先遣滿刺哈三附古里諸國來朝貢令內臣至其國賜王文綺

小葛蘭

小葛蘭小國也、東連大山、西南北皆海、永樂中、太監鄭和至其國、王鎖里人遣人入貢、俗尚浮屠、重象牛、飯和酥酪、市用金錢、婚喪巾服大類錫蘭山、自錫蘭山別那里西北海行六晝夜可至、

古里班卒

古里班卒在海中、永樂三年、國王遣人馬的來朝貢、其俗土瘠、穀少、登氣候不齊、夏多雨、雨卽寒、俗質朴、男女披短髮、假錦纏頭、紅油布繫身、物產甚

薄、

呂宋

呂宋在海中、其國甚小、顧產黃金、以故亦富厚、人頗質朴、不喜爭訟、永樂三年、國王遣隔察老來朝貢、

合猫里

合猫里地小土瘠、國中多山、山外大海、海饒魚蟲、人亦知耕稼、永樂三年、國王遣回回道奴馬高來朝貢、產蘇烏木、胡椒、

磔里

磔里國在東南海中大洲上，洲有諸港通海，人淳少訟，尚佛，物產甚薄。永樂三年，國王遣使馬黑木來朝貢。

打回

打回海外小國，數爲鄰國所苦，已乃治兵器，與隣國戰，戰勝，稍得自立。永樂三年，遣麻勿來朝貢。

日羅夏治

日羅夏治海中小國，無他奇產，產蘇木、胡椒，人頗

知種藝、無盜賊、崇佛教、永樂三年、國王遣文那打時鎮來朝貢、

忽魯母恩

忽魯母恩在東南海中、或曰在西徼外、國小土瘠、物產薄、永樂三年、國王遣已卽丁朝貢、

忽魯謨斯

忽魯謨斯在西南海中、東連大山、國中土厚、宜耕種、人質直、狀貌偉碩、喜作佛事、常歌舞、惡殺、永樂三年、國王遣馬刺足來朝貢、產大馬、西洋布、獅子、

駝雞福祿靈羊馬哈獸

甘巴里

甘巴里在南海中大島上，人多織錦，粒食，亦鮮食。
永樂十二年，國王兜哇刺查遣得名公葛葛來朝
貢。

古麻刺

古麻刺在東南海中，永樂時，王哇來頃本率其臣
來朝，至福州卒，賜諡康靖，勅葬閩縣，有司歲時祭，
討來思。

討來思在海中、周徑不百里、城近山、山下有水、赤色、望之如火然、俗尚佛、婦人主家事、市中多駝羊馬牛、亦有布縷毛褐、交易用錢、土宜黍稷、無稻穀、宣德六年、嘗遣人朝貢、

吃力麻兒

吃力麻兒、永樂中、遣使十一人來朝、貢方物、惟獸皮、鳥羽、罽褐之類、其俗不事耕農、喜射獵、山卑水淺、西南傍海、東北林莽深密、多猛獸毒蟲、得中國雄黃麝香磁器甚喜、有達巷、無市肆、交易無期、用

鐵鐵

納失者罕

納失者罕東去失刺思數日程皆舟行海中其國山林川澤有林木魚蟲城東平原饒水草可牧馬馬有數種最小者高不過三尺俗敬事僧僧所至必飲食之顧尚氣健鬪鬪不勝者衆共嗤之永樂中遣使十人來朝貢

亦思把罕

亦思把罕於西南海中爲大國廣袤近千里四面

皆海西北多山東南皆平沙國有城堅壯王居亦
侈麗物產豐厚風俗朴厚尚佛畏刑喜施惡奪亦
有中國人寓寄者時時出賈撒馬兒罕市多馬駝
少布帛有珠珀而無稻黍日食惟麥糝麥粒麤壯
甘美永樂中遣使四十四人來朝貢

淡巴

淡巴在西南海中洪武十年國王遣人來貢賜之
金幣其國風景秀贍土地廣衍泉甘而水清草木
暢茂畜產甚夥城以石築屋以瓦覆王乘輿官跨

馬頗有威儀國人勤生種藝織縷抱布男女咸務
常業市有交易野無寇盜稱樂土矣

甘把里

甘把里永樂間遣六人來朝貢自言其國小介于
西南海中與諸鄰國不通交易物產又薄山無長
林田無宿麥以故國用常乏人民艱窘然奉佛教
不求積聚無乞丐者

答兒密

答兒密永樂間遣使十八人來朝貢方物賜大統

曆文綺藥茶國在海中，不百里，人不滿千家，有墻
壘而無城郭，屋以板覆，田以牛耕，王居官舍不甚
差別，產馬、駝、羊、牛、毛、褐、布、縷，交易兼用銀錢，刑專
用箠朴，服屬撒馬兒罕。

阿速

阿速在西海中爲大國，多撒馬兒罕，天方諸國人，
有城倚山面川，川南流入海，海有魚鹽之市，野有
耕牧之利，敬佛畏鬼，好布施，惡爭鬪，物產饒，俗涼
，適節，人無饑寒，夜無寇盜，永樂中遣百十二人

來朝貢

沙哈魯

沙哈魯永樂間遣七十七人來朝貢，國在阿速西南海島中，人民淳直，恥鬪好佛，交易海中諸國西域賈胡來市海中奇物，不惜高價，亦有價廉而得奇貨去者，沙哈魯人不識也。王及酋長居城中，有瓦屋，庶人旅處城外，田野中村落相聚，山川環抱，畜產豐利。

武備志卷二百三十八

防風茅元儀輯

占度載

度 四十九

四夷 十六

安南考

安南唐虞時南交也秦爲象郡漢初南越趙陀據之武帝平南越置交趾九真日南三郡光武時女子徵側徵貳反馬援討平之建安中改爲交州置

牧唐置都護府，改爲安南。五代時，土豪曲承美據之，已爲南漢所併。宋初，丁璉有其地，封交趾郡王。自是棄爲夷。璉傳弟璿，黎桓篡之。桓傳子龍挺，李公蘊篡之。公蘊八傳嗣絕，爲其壻陳日昷所有。元攻下之，封其子光昷爲交趾郡王。終元世貢不絕。亦時時侵掠邊郡，不敢大爲寇。國朝洪武二年，國王陳日燿遣使同時敏等來朝貢。上命侍讀學士張以寧典簿牛諒齎詔封日燿爲安南國王，給鍍金銀印。未至，日燿卒。姪日燿嗣，請詔印於以寧拒。

之、吾受命封先王、何以得擅予若、日燧請於朝、
遣編修王濂主事林唐臣、封日燧嗣王、而嗟賞以
寧、得使臣體日燧拜詔甚恭、未幾爲陳叔明所篡、
叔明老弟端代視事、端攻占城敗死、弟煒代、先是
上嘗戒安南占城毋相攻、至是以叔明兄弟怙強、
速禍、復遣使諭之、叔明表謝、連歲貢上厭其數、令
三年一貢、毋侈方物、進犀象以勞吾民、二十一年、
黎季犛弑煒、立叔明子日焜、命絕其貢、叔明八年
死、上以叔明身自爲篡、勅禮臣毋弔、而遣行人陳

三十一
誠呂讓諭還所侵思明五縣不聽日焜旋亦爲季
犁所弑季犁大誅殺陳氏更姓名曰胡一元子蒼
曰胡奎僭號紀元國曰大虞永樂元年表言陳氏
世絕奎爲陳甥求署國事從之已真封爲王會陳
氏故臣裴柏耆走闕下乞師而老搗亦傳送故王
孫陳天平來朝安南使者見天平多泣下詔詰季
犁季犁詭請迎天平歸還以國天平行命都督黃
中呂毅率兵五千送之季犁遣使迎具牛酒犒師
偵騎往壺觴道相屬也不爲虞行至芹站伏發殺

天平及大理卿薛嵒中等引還上大怒以成國、
朱能爲征夷將軍率新城侯張輔西平侯沐晟等
二十五將軍出廣西雲南兩道討李稔而以尚書
劉儁督師尚書黃福大理寺卿陳洽督餉親幸龍
江禡祭戒諸將毋縱吏士暴掠毋輕進貪功罪人
得則歸國陳氏擇立其子孫能行至龍州卒輔進
破隘留鷄陵等關傳檄數黎賊二十罪師次新福
縣晟亦自雲南至白鶴江遣人與輔會上命輔盡
護諸將兵代能時賊恃宣洮富良諸江爲固緣江

樹柵立椿、別築土城、備禦甚嚴、欲老我師、輔晟合
攻之下、令軍中丈夫報國立功、在此時矣、先登者
賞不次、士皆奮、銜枚舁攻具薄城、裨將蔡福先登、
衆繼之、舉火城上、銅角齊鳴、賊披靡退、驅象巷戰、
遊擊將軍朱廣以畫獅蒙馬、神機銃翼而前、象奔、
賊大潰、斬獲及蹈藉死者無筭、進克東西都、賊焚
城遁、連戰萬刼、江木九江、閩海口皆大破之、諸郡
邑相繼降附、輔徧宣上意、令安業隨窮追季犂父
子於奇羅海口、都督柳升以舟師會、悉擒之、安南

平得戶三百一十二萬，象馬牛羊舟糧器械無等，捷聞，詔求陳氏後無存者，父老合辭請郡縣視內地，乃置交趾都指揮布政按察三司府十七州四十七縣一百五十七衛十一所三市舶司一，以尚書福總布按二司事，勅輔求交趾有能學藝者，舉以聞。六年，輔振旅還，論功進輔英國公晟黔國公升安遠伯，餘陞賞有差，已交人簡定反，命晟討之，僞復督師晟戰敗績，僞及都督呂毅叅政劉昱皆沒，賊黨陳季擴鄧宗異等益猖獗，乃命輔往輔率

吳者又
吳者

諸將敗賊馘子關，又敗之太平海口，追至清化，殲其黨。季擴自言我陳王後也，請立不許，請降許之，以爲交趾右布政使。輔歸，復反，竟復遣輔轉戰連年，賊乃獲自輔之下。交南凡三擒僞王，威震西南夷中，遂留填其地。而尚書福有威惠，交人懷之，弭伏莫敢動。十五年，召輔還，以豐城侯李彬代。久之，福亦歸。尚書陳洽代時，中官馬騏墨而殘，交人怨之。三年之間，叛者四五起，彬先後討敗之。而黎利最劇，連結老撾，出沒縱橫，彬不能制。詔以爲清化

知府利許諾，然竟不赴，而攻刦日甚。先後破茶州、諒山府、茶籠、守琴彭、諒山、守易先，皆堅守，力盡俱死之。洽力言利詐，宜亟誅，而中官山壽持撫議甚堅，擁兵自衛。諸將陳智方政復不相能，彼此牽掣，師遂敗。事聞，章皇帝下璽書切責，而以成山侯王通總兵討賊。通戰寧橋中，伏大敗。尚書洽死之。已敗，賊交趾城下，殺萬餘人。諸將請乘勝蹙賊，通不從。賊知通怯，益聚衆肆掠。攻昌江城，守將李任顧福日夜拒戰，焚其攻具。賊益起土山，以飛鎗射。

城中任福率敢死士夜開門殺守土山者襲破其營賊爲地道入鑿橫溝應之從溝中發石擊殺賊甚多賊恐大軍至據其城攻圍不休相拒九閱月城中將士三千餘人至是亡其半力竭不能支城遂陷任福皆自刎死中官馮智北向再拜誓不從賊與指揮劉順知府劉子輔俱自經死軍民感其義同死者甚衆上遣安遠侯升黔國公晟分道往援以尚書李慶督師升剽而輕旣連勝易賊慶言宜少戒升不聽竟中伏死慶及副總兵梁銘相繼

病沒，叅將崔聚率兵進至昌江，賊大驅象而前，軍亂聚被擒。時尚書福在軍，交人得福，環跪泣。公在我曹不至此，兢送之歸，而晟兵竟不出，通懼大賂遺利與盟而旋師。按察使楊時習爭之強不聽，羣臣劾通并馬騏，下詔獄論死。通後竟脫利美言，前國王遺嗣嵩今在老撾，請嗣封。上集大臣議，英國公張輔尚書蹇義夏原吉皆言交南本中國地，勞苦而得之，不宜墮成功，示賊以弱。大學士楊士奇、楊榮頓首言：「兵興以來，天下無寧歲，今瘡痍未起，

而復勤之、臣不忍聞、且求立陳後者、太宗皇帝心也、求之不得而後郡縣叛亂相尋、至深厯先帝憂、今因其請撫而建之以息吾民於計、大便漢棄珠崖前史榮之、安在爲示弱乎、上曰卿二人言是先帝指朕固知之、明日出勅表諭羣臣、朕以止戈爲武、卽議者未同、無庸恤、羣臣頓首稱善、於是命禮部侍郎李琦、工部侍郎羅汝敬齋、詔召安南文武吏士皆來歸、并覈陳氏後當立者以聞、利遣頭目黎公僕等送還官吏百五十七人、戍卒萬五千一

百七十人、馬千二百匹、其陷沒不得歸者無算、日言曷死、陳氏種絕、上心知其妄、然業置之、乃詔利權署安南國事、八年利死、子麟代之、正統初、以麟事朝廷恭、詔封爲安南國王、諭令還所侵欽州地、及逋民二百餘戶、麟卒、子濬嗣、遣兵攻占城、執其王摩訶賁、該以歸、詔歸其王、不聽、濬爲庶兄琮所弑、弟顥嗣、輒侵我土司地、攻殺老撾、宣慰使刀板雅、蘭掌父子、爲八百敗歸、累詔戒諭之、顥驚、顥自如、屢攻占城、併其國、我無以禁、而中官錢能鎮雲

南復私與瀨通，闌結諸夷，奸宄繹騷，幾危雲南。賴巡撫王恕發其奸，亂乃弭。弘治十年，瀨死。子暉嗣，使者入貢，乞改所賜常服，從王制，不許。十七年，暉卒。弟誼嗣。阮种弑之，立瀨庶子暘。暘孱甚，政在羣下。盜起，國亂。正德十一年，陳暘弑暘，自立。莫登庸逐暘，立暘兄子諱，專其國。暘奔據諒山，死。諱迫於登庸，奔清化。庶弟應立交人云：應，登庸子也。無何，死。登庸遂竊安南王。其子方瀾，諱竟死清化。故臣共立諱子寧，居木州漆馬江，倚老嫗爲援。嘉靖十

六年、寧遣鄭惟僚來乞師、上以登庸弑逆、又久不
庭當誅、議討之、以咸寧侯仇鸞爲帥、尚書毛伯溫
督師、伯溫至廣、區畫諸便宜爲進兵計、廣守臣多
難之、且謂莫之篡黎、猶黎之篡陳、先後事同、不足
誅、登庸亦遣人自歸、廷議未決、伯溫駐師境上、檄
諭交人、懸重賞、購登庸父子、懼、請束身待罪、歸欽
州四峒故地、世世奉職貢、乃於鎮南關築壇具儀、
登庸率其屬繫頸徒跣、北面匍匐上表降、伯溫承
制受之、詔赦登庸歸、廢勿王、以爲安南都統使、世

其職仍覈黎寧果黎後則畀以所據地否則已制下登庸已死授其孫福海二十六年福海死子宏瀾幼阮如桂等擁立之族人莫正中欲爲亂不克來奔三十年命宏瀾嗣四十三年貢使黎光賁至京光賁以國難羈留南寧者十五年至是乃達其後貢遂絕萬曆間莫茂洽爲都統使茂洽死國大亂數年鄭惟憐子鄭檢立黎暉後黎維邦爲主維邦死檢子松復立維邦子維潭嗣盡逐莫氏遺孽莫敬用竄居高平府敬璋敬恭竄居東海府保樂

州復內相讎、未幾敬璋爲黎兵所殺、維潭遣使浮海詣督臣歸罪、請款闕輸貢、移文擅用前國王印、守臣詰之、維潭飾辭對、然請款愈堅、因與約、必以高平居莫氏如黎氏漆馬江故事、維潭心難之、業爲期啓、關有日矣、遂遁去、頃之復款、具言其恢復之義、歸附之誠、第謂高平乃其故土、且莫氏篡臣、不宜以漆馬江爲比、守臣曰、莫氏在先世、雖爲篡逆、今日乃國家之外臣也、爾安得滅之、以彼奔敗之餘、使得假息一隅、毋遽殄絕、是我國家所以鎮

撫四夷共其患難之意也。且彼此分定，我諸土司亦毋敢黨亂，以遺爾憂於爾，豈不利焉？而愛此尺寸之地，爲維潭乃聽。二十四年夏四月，築壇具儀受其降，具如登庸故事。督臣陳大科疏聞，因盛言莫之篡黎其事逆，先朝猶赦其愆，况黎之復讎，其名正，今日宜許其順，以夷治夷。祖宗成法，事下兵部議。如大科言，詔以維潭爲都統使，予莫敬用以高平令，維潭毋得。口安南復定其地，東至海西至老撾，南接占城。

忠明衡二千八百里，從一

千七百里夷獠雜居、獷悍喜鬪、其君長尤狡獪、有
二名以僞名事中國、自黎氏以來、雖奉貢稱藩、然
自帝其國中、如趙佗故事、死則加僞謚、黎暲之弑、
或云鄭惟鏞爲之、陳暲討惟鏞而僭焉者也、諛者
惟鏞所立也、鄭宗強亡黎者、鄭也、登庸乘亂而竊
其柄者也、寧者非真諛子也、傳聞厯不得而詰矣、
其俗惟交愛人、倜儻驩演人、淳秀有華風、文學則
驩演爲盛、其山川佛跡、勾漏、傘圓、富良、江宣、光江
爲大產、金、珠、珊瑚、玳瑁、丹砂、諸香、蘇合、油、胡椒、荖

羊角犀角、兕、白鹿、猩猩、狒狒、白雉、翡翠、蟒蛇、蟻子、
鹽、醢、波羅密、菴羅果、烏木、蘇木

茅子曰：昔當宣德間，西東楊稱名臣哉！然其勸宣
皇帝之棄安南，先臣謂良策也。我敢同聲而和耶？
文皇帝兩出師，損士衆，傾府庫，竭倉廩。當是時，天
下良苦之。數公者，固腹心帷幄之臣也，豈不可置
一語哉？及郡邑之戍守之，章章有程，士大夫便於
朝，農便於野，商賈便於道，一夫跳梁，委而棄之，肯
堂肯構，其謂之何？是役也，實基於文皇，以輔得之。

使以輔守之、如黔之於雲南也、安得屢叛哉、其議棄之也、輔實爲元老、不敢堅其說、將有望耶、抑不得已耶、嗟乎、屯法之弊、軍民均病焉、二公之所爲也、恩可殉、法可弛、根本可不虞、况區區疆域哉、迨肅皇帝以天縱之英武、慨焉欲正篡弑之罪、而當是時、有君無臣、至今惜之、君臣之難相遭也、如此哉、然有文皇在、數公者皆宣力王家者也、故曰爲君難、謹按其疆域之詳、及進兵之道於左方、以告後之君臣、

疆域

永樂四年、建安南等處承宣布政使司、提刑按察
司、都指揮使司、治交州府、領府一十七州、四十一
縣、一百四十二、又州五、領縣一十五、共爲州四十
六、縣一百五十七、

交州府 領州五、縣一十三、

慈廉州

福安州

威蠻州

利仁州

三帶州

東開縣

慈廉縣

石室縣

英留縣

清潭縣

清威縣

應平縣

平陸縣

利仁縣

安朗縣

安樂縣

扶寧縣

立石縣

北江府

領州三、
縣七、

嘉林州

武寧州

北江州

嘉林縣

超類縣

細江縣

善才縣

東岸縣

慈山縣

善誓縣

諒江府

領州二
縣一十

諒江州

上洪州

清遠縣

那岸縣

平河縣

鳳山縣

陸那縣

安寧縣

保祿縣

古隴縣

唐安縣

多錦縣

諒山府

領州七
縣五

上文州

下文州

七源州

萬涯州

廣源州

上思州

下思州

丘温縣

鎮夷縣

淵縣

丹巴縣

脫縣

新安府

領州四縣
一十三

東湖州

靖安州

南策州

下洪州

至靈縣

岐山縣

古費縣

安老縣

水棠縣

支封縣

新安縣

和同縣

利縣

萬寧縣

雲屯縣

西岐縣

清沔縣

建昌府

領州一
縣六

快州

建昌縣

布縣

真利縣

東結縣

芙蓉縣

永涸縣

鎮蠻府

領縣
四

廷河縣

大平縣

古蘭縣

多翼縣

奉化府

領縣四

美祿縣

西真縣

膠水縣

順爲縣

建平府

領州縣六

長安州

蠻安縣

大懿縣

安本縣

望瀛縣

安寧縣

黎平縣

三江府

領州三、縣六

北江州

宣江州

沱江州

麻溪縣

夏華縣

清波縣

西蘭縣

古農縣

宣化府

領縣九

曠縣

當道縣

文安縣

平原縣

底江縣

收物縣

大蠻縣

楊縣

乙縣

大原府

領縣十一

富良縣

司農縣

武禮縣

洞喜縣

水通縣

宣化縣

弄石縣

大慈縣

安定

感化縣

天原縣

清化府

領州四、縣一十一

九真州

愛州

清化州

葵州

安定縣

永寧縣

古藤縣

梁江縣

東山縣

古雷縣

農貢縣

宋江縣

俄樂縣

磊江縣

安樂縣

義安府 領州四縣
一十三

驩州

南靖州

茶籠州

王麻州

衙儀縣

友羅縣

丕祿縣

士油縣

偈江縣

真福縣

古社縣

土黃縣

東岸縣

石塘縣

奇羅縣

盤石縣

河華縣

新平府

領州二
縣三

政平州

南靈州

衙儀縣

福康縣

左平縣

順化府

領州一、縣一

順化州

利調縣

石蘭縣

巴閭縣

安仁縣

茶偈縣

利蓬縣

乍令縣

思蓉縣

蒲台縣

蒲浪縣

士榮縣

升華府

領州四、縣一

升華州

思義州

黎江縣

都和縣

安蒲縣

萬安縣

具熙縣

禮梯縣

持羊縣

白鳥縣

義純縣

鵝孟縣

溪錦縣

廣威州

領縣二

麻籠縣

美艮縣

宣化州

領縣三

赤土縣

車來縣

塊縣

嘉興州二領縣

龍縣

蒙縣

四忙縣

歸化州四領縣

安立縣

文盤縣

文振縣

水尾縣

演州三領縣

瓊林縣

茶清縣

芙蓉縣

安南偽制、卽交州偽東都、僭設五府、五部、六寺、御史臺、通政司、五十六衛、四城兵馬等衙門、附郭府

一曰奉天縣二曰廣德永昌其西都今爲清華承政古齋本登庸故鄉無城郭以鐵力木作排柵三層爲外衛登庸所自居也外分道十三設承政司憲察司總兵使司

安邦承政司卽交州地領府一曰海東海陽承政司卽新安地領府一曰海陽

山南承政司卽諒江建昌奉化鎮蠻建平地領府一十一曰上洪下洪天長廣東應天荆門新興長安涖仁平昌義興

京北承政司、卽北江諒江地、領府四、曰北河、
山、諒江、順安、

山西承政司、卽交州三江、嘉興、歸化地、領府六、
曰歸化、三帶、端雄、安西、臨洮、沱江、

諒山承政司、卽諒山地、領府一、曰諒山、

太原承政司、卽太原地、領府三、曰太原、富平、通
化、

明光承政司、卽宣化地、領府一、曰宣化、

興化承政司、卽廣威州地、領府三、曰興化、廣威、

天關、

清華承政司、卽清化地、領府四、曰紹天、鎮寧、蔡州、河中、

义安承政司、卽义安、演州地、領府八、曰义安、肇平、思义、奇華、德先、演州、北平、清都、

順化承政司、卽順化、升華地、領府三、曰順化、英都、昇華、

廣南承政司、卽义安、領府三、曰廣南、茶麟、五麻道里

交道三、一由廣西、一由廣東、一由雲南、由廣
用水軍伏波以來皆行之、廣西道宋行之雲南
道、元及我朝始開廣西道亦分爲三、從憑祥州入
者、由州南關隘、一日至交之文淵州坡壘驛、復經
脫朗州北、一日至諒山衙、又一日至溫州之北、險
徑半日至鬼門關、又一日經溫州之南新麗村、經
二卜江、一日至保祿縣、半日渡昌江、又一日至安
越縣、南市橋江下流北岸、一道由思明府入、過摩
天嶺、一日至鬼陵州、過辨強隘、一日至祿平州、州

西有路、一日半至諒山府、若從東南行、過車里江、此江永樂中黎季犛堰之、以拒王師、後偵知其堰處、乃決之以濟師、一日半至溫博州、又一日率過耗軍峒、山路險惡、又一日至鳳眼縣、又分二道、一道一日至保祿縣、亦渡昌江、一道入諒江府、亦一日至安越縣之南市橋江北岸、各與前道會、其自龍州入者、一日至平而隘、又一日至七源州、二日至文蘭平茄社、又分爲二道、一道從文蘭州、一日經右隴縣北山徑、出鬼門關下四十里、渡昌江上

源經右隴之南、沿江南岸而下、一日至世安縣大
地至安勇縣、又一日亦至安越縣之中市、橋江北
岸、一道從平茄社西、一日半經武崖州山、經二日
至司農縣平地、又一日半亦進至安越縣之北市、
橋江上流北岸、市橋江在安越縣境中、昌江之南、
諸路總會之處、隨處皆可濟師、一日至慈山府、歷
東岸嘉林等縣、渡富良江、以入交州、雲南亦有二
道、其一道由蒙自縣、經蓮花灘、入交州之石隴關、
下程瀾峒、循洮江源右岸、四日至水尾州、又八日

至文盤州、又五日至鎮安縣、又五日至夏華縣、又三日至清波縣、又三日至臨洮府、洮水卽富良江上流、其北爲宣光江、南爲沱江、所謂三江者也、臨洮二日至山圍縣、又二日至興化府、卽古多邦城、自興化一日至白鶴神廟三岐江、又四日至白鶴縣、渡富良江、其一道自河陽隘、循洮江左岸、十日、至平源州、又五日至福安縣、又一日至宣江府、又二日至端雄府、又五日亦至白鶴三岐江、然皆山徑、欹側難行、其循洮江右岸入者、地勢平夷、乃大

道也。若廣東海道，自廉州烏雷山發舟，北風順，一二日可抵交之海東府。若沿海岸以行，則烏雷山一日至永安州，白龍尾，白龍尾二日至玉山門，又一日至萬寧州，萬寧一日至廟山，廟山一日至屯卒巡司，又二日至海東府。海東二日至經熟社，有石堤，陳氏所築，以禦元兵者。又一日至白藤海口，過天寮巡司，南至安陽海口，又南至塗山海口，又南至多漁海口，各有支港，以入交州。自白藤而入，則經水棠、東潮二縣，至海陽府，復經至靈縣，過

黃徑平灘等江其自安陽海口而入則經安陽縣至荊門府亦至黃徑等江由南策上洪之北境以入其自塗山而入則取古齋又取宜陽縣經安老縣之北至平河縣經南策上洪之南境以入其自多漁海口而入則由安老新明二縣至四岐遡洪江至快州經鹹子關以入多漁南爲太平海口其路由太平新興二府亦經快州鹹子關口由富良江以入此海道之大略也交州之東有海陽荊門南策上洪下洪順安快府等府去海頗遠各有支

港穿達、迤邐數百里、大艦不能入、故交人多平底
淺舟、以便入港云、